

Lu pizzinu

Di nicareddi nun putennu parlari cu li fimmineddi, natri masculiddi, nun sapiamu comu fari pi diricci quarchi cosa. Taliannuni 'nta ll'occhi capivamu si cci piacivamu o no. Cci passavamu centu voti di dintra pi putilli vidili macàri davanti la porta, affacciati a lu barcuni o si èranu pronti pi nesciri. Quannu nun li vidivamu ni nni ivamu siddiati e malincuniati a la chiazza spirannu, macàri, ca li vidivamu passari. Pi tucàri 'na fimmina aviamu aspittàri ca s'avìa maritari quarcunu, parissi strana la cosa, ma era accussi. Era l'unicu modu, ènnucci a lu trattinimentu, pi putiri ballari cu quarchi picciuttedda e stàricci tecchia a cuntattu.

'N'ogni matrimoniu natri èramu sempri mmitati, < dicivamu semu 'mmitati di lu sinnacu >, nun nni facivamu scappari unu, tra di natri 'ni 'nfurmavamu dicennu: < vidica dumani c'è matrimoniu, pripàrati.> Quannu capivamu ca era lu mumentu pricisu, lintavamu di travagliari pigliannu 'na scusa, iu ca travagliava 'ni me patri cci diceva ca avìa agghiri a gabbinetu, dopu 'na para duri m'arricampava. Me patri vidennu ca tardava assà mi diceva: < Chi ti sintisti mali? Chi hai sciuglimentu di stòmacu? Chi ffa chiamamu lu dutturi?> Mi lu diceva pi smancica pirchè sapiva e capiva unni avìa statu e ca ogni tantu la cosa si ripetiva.

A lu trattinimentu spinnivanu tavula calda, viscotta, aranciata, cunvittura e atri cosi, ma a natri 'ni 'nteressava sulu ballari. 'Ni sistimavamu vicinu la picciuttedda e quannu cuminciava la musica, natri già èramu pronti a stagliari ognunu chidda chi 'ni piaciva. Certi voti, iu, la picciuttedda ca vuliva ballari la ucchiava prima e di luntanu cci faciva capiri ca avìa a stagliari a idda, capènnumi mi faciva cennu < va beni. > Comu la stagliavanu l'atri picciotti, idda cci diceva: < 'mpignata sono >, arrivava iu friscu e tranquillu e cci ballava.

Comu 'ni mittivamu 'mposa pi ballari, cci mittivamu la manu 'ni lu sciancu e la facivamu sciddicàri finu a la schena, cu l'atra manu ci tinivamu chidda so accussi stritta ca pi miraculu nun si cci stuccava, orbu di locchi lu cori parica a mumentu a l'atru scuppiava. Eccu lu cuntattu tra masculiddi e fimmineddi. Era un mumentu magicu, trimavamu comu li fogli, ma lu piaciri di aviri na fimmina tra li vrazza pi natri era un sognu, nni sintivamu 'mpurtanti, 'ni sintivamu veru masculuna. A quarcuna ca capivamu ca cci piaciva lu "discursu" la strincivamu chiossà, accussi sintivanu lu cori comu 'ni battiva, metri quarcuna, 'nveci nni mittiva "lu cugnu" < Lu "cugnu"era lu vrazzu sinistru misu piegatu e appuiatu a lu pettu di lu masculu, 'ni stu modu anchi ca vulivamu strinciri lu spàzziu era chiddu, eccu chi era lu cugnu. > Cu chiddi chi cci stàvanu, cci dicivamu quarchi palora a l'aricchi scantannuni ca 'ni vidiva so patri o so matri. Ognunu di natri aspittava lu ballu lentu, accussi stàvamu cchiù stritti e li movimenti li fàcivmu lenti-lenti.

Di nicareddu c'era na picciuttedda ca mi piaciva assà, quannu la vidiva lu cori mi battiva a milli all'ura, quannu 'ni taliavamu 'nta ll'occhi, iu, cci trasiva dintra a taliari lu so cori, cercava di capiri si iu cci piaciva vidè. 'Sta picciuttedda la vidiva picca e nenti, a la mattina mi mittiva ammucciatu vicinu la so casa pi cu sà nisciva, mentri a la notti mi la sunnava ... ch'era bellu! Pariva tuttu veru, nn'abbràzzavamu, nni vasavamu, 'ni strincivamu, 'n'accarizzavamu, cu tantu amuri, ma appena grapiva ll'occhi scumparivanu tutti cosi, però lu sapuri di li so vasati mi ristava 'mucca pi tutta la iurnata, quasi-quasi nun avissi vultu manciari pi nun cancellari ddu sapuri. Quarchi vota ca la vidiva a la chiazza era: idda davanti e so patri e so matri narrè, la taliavanu, criditimi, cu la scupetta parata, nun la putiva mancu avvicinari.

A lu iornu quannu pinzava a idda, quasi mi viniva di chiànciri, pirchè vulia diricci tanti cosi, cci avissi vultu diri ca la penzu sempri di iornu e di notti, 'nveci nun ci putiva diri nenti. Cuntuamenti mi spirniciava pi vidiri comu putiva fari pi putiricci parlari, ma 'un c'era versu. 'Na mattina cu lu celu mezzu annuvulatu e lu ventu ca sciuciava, mentri caminava versu la so casa, pi

putilla vidiri, lu ventu fici vulari tecchia di carta ‘mpignuniata, mittènnusi quasi sutta li me pedi, pi crusietà lu pigliavu pi vidiri soccu c’era scrittu: c’èranu appunti di spisa < patati, cipuddi, fasoli, pani ... , a menti me sùbitu pinzavu! << Cci pozzu scriviri un pizzinu e daricillu! >> accussì sulu cci pozzu diri quarchi cosa. Sùbitu ivu dintra, carta e penna e cci scrissi soccu cci vuliva diri. Lu piegavu ‘nquattru mi lu misi ‘nsacchetta aspittannu lu mumentu giustu pi daricillu. Passa oi e passa dumani, ddu pigliettu mi ristà ‘nsacchetta chiossà di un misi, tantu ca me matri c’avia a lavari lu pantaluni sinn’addunà di lu bigliettu e mi dissi: << ‘nsacchetta c’era ‘stu pezzu di carta, ti servi? >> Cci rispunnivu: si-si, dunamillu ca cci haiu appuntatu na cosa.>>

Sempri iu a li pustii pi putilla vidiri, un iornu capità ca niscì cu ‘na so amica, capivu ca chistu avia èssiri lu mumentu giustu pi dàricci lu fugliettu. Capivu la strata chi stàvanu facennu, di cursa giravu la cantunèra e cci ivu ‘ncontru, di luntanu cci faciva segnu e cci faciva vidiri ddu pezzu di carta, mentri ‘ni ivamu avvicinnannu, occhi ‘ntra occhi ci fici capiri ca si l’avia a pigliari. Cci passavu vicinu-vicinu, cci alluncavu la manu e idda comu si avissimu parlatu prima, grapì la manuzza e si piglià ddu bigliettu.

La cosa arriniscì comu iu pinzavu, currennu, mi nni ivu dintra cu lu cori chi mi stava scuppiannu, però cuntenti ca finalmente idda avia na cosa me di lèggiri e sapiri lu me pinzeri. Dopu stu fattu, li iorna mi passaru cchiù cueti, quannu ‘ni vidivamu oltri la taliata mi faciva puru lu surriseddu, ‘nzumma capivu ca iu cci piacivu vidè, perciò capivu ca ggìa èramu zziti. Di ddu pizzinu cci vuliva scriviri tanti cosi belli ... ca mavissi piaciutu caminari cu idda a la chiazza mani manuzzi, ca mavissi piaciutu abbrazzalla, vasalla, accarizzalla, ma parènnumi malu, cci scrissi sulu “TI AMU”.

2013 *Giuseppe Cardella*